

泉州府志

第二十一册

卷之四十三

K295.7

2

泉州府志

第二十二卷

藝文志

卷二十二
藝文志

泉州府志卷之四十三

人物列傳

明列傳五

俞大猷

趙恒

王時儉

王春復

劉存德

黃養蒙

洪朝選

史朝賓

林一新

張冕

莊應禎

莊朝賓

張峯

郭文煥

傅夏器

李慎

朱一龍

陳道基

薛天華

俞大猷字志輔號虛江晉江人泉州衛百戶敏之裔少好

讀書受易於王宣得蔡清之傳又聞趙建郁以易推行

兵家奇正虛實之權復從受業謂兵法數起五猶人身

有五體雖百萬衆可使合爲一人也父歿棄諸生嗣世

職百戶學

射輒命中從李良欽學劍盡得其術舉嘉

靖乙未武會試第五人除千戶守禦金門軍民囂訟難
治大猷導以禮讓訟爲衰止海寇頻發上書監司論其
事監司怒曰小校安得上書杖之奪其職尚書毛伯溫
征安南復上書陳方畧請從軍伯溫奇之會兵罷不果
用俺答入山西詔天下舉武勇士御史上其名兵部會
伯溫爲尚書送之宣大總督翟鵬所召見論兵事大猷
陳安邊長久之計屢折鵬鵬謝曰吾不當以武人待子
下堂禮之驚一軍然亦不能用辭歸授汀漳守備作讀
易軒與諸生爲文會而日教武士擊劍連破海賊康老

俘斬三百餘人擢廣東都司僉書平新興陽春恩平陽
江峒賊譚元清等朱紘巡視福建薦爲備倭都指揮會
安南都統使莫福源卒子宏濶幼莫正中與莫敬典爭
立互殺正中敗挈殘卒來歸其黨范子儀遁海東至是
妄言宏濶死迎正中歸立剽掠欽廉諸州廣督歐陽必
進奏畱大猷討賊大猷馳至解廉州圍賊犯欽州大猷
戰數日生擒子儀弟子流斬首千二百級檄莫宏濶殺
子儀函首來獻事平嚴嵩抑其功不敘時瓊州黎那燕
構感恩昌化諸黎共反卽以大猷爲崖州叅將會廣西

副將沈希儀諸軍擒斬賊五千三百有奇招降者三千七百大猷言於必進曰黎亦人也率數年一反一征豈上天生人意宜建城設市用漢法雜治之必進納其言大猷乃單騎入峒與黎定要約海南遂安三十一年倭賊大擾浙東移大猷寧台諸郡叅將請用閩中樓船攻賊總督王忬從之時王直勾倭據烈港大猷發兵擊之與戰于寧波紹興松陽復邀諸海斬獲四千溺者不可勝計自是不敢犯坐失事停俸未幾逐賊海中焚其船五十餘予俸如故賊據寧波普陀殺武舉火斌等三百

人坐戴罪辦賊俄敗賊吳松所詔除前罪仍賚銀幣賊
自健跳所入掠大猷連戰破之旋代湯克寬爲蘇松副
總兵擊賊於平望又戰於六金埧皆大捷斬首三千級
已而賊犯金山大猷所將卒不三百人戰失利倭屯松
江柘林大猷從總督張經大破賊於王江涇功爲趙文
華胡宗憲所攘不敘坐金山失律謫充爲事官繼而新
倭三十餘艘突青村所與南沙小烏口浪港諸賊合犯
蘇州陸涇壩直抵婁門敗南京都督周于德兵賊復分
而爲二北掠許墅南掠橫塘延蔓常熟江陰無錫之墟

出入太湖大猷偕副使任環大敗賊于陸涇壩焚舟三十餘又遮擊其自三丈浦出海者沈七艘賊乃退泊三板沙頃之他倭犯吳江大猷及環又邀破之于鶯脰湖賊走嘉興三板沙掠民舟將遁大猷追擊於馬蹟山擒其魁金涇許浦白茆港賊俱出海大猷追擊於茶山焚五舟擊壞及覆者無數賊退登陸已復泛舟出海大猷及僉事董邦政分擊獲九舟賊屢敗趙文華等大軍廵撫曹邦輔劾大猷縱賊帝怒奪其世廕責取死罪招立功自贖大猷偕副使王崇古入洋追賊焚巨艦八斬獲

無數廷臣爭言大猷才遂罷總兵官劉遠以大猷代運
敗賊于西庵沈莊清水窪黃浦詔還世廕以與平徐海
功加都督僉事時舟山賊積歲不下大猷佯爲不戰乘
大雪密遣裨將張四維縱火襲之斬賊一百四十賊死
戰殺土官一人諸軍益競進焚其柵賊殪殆盡加署都
督同知明年總督胡宗憲圖汪直用盧鏗言將與通市
大猷力爭不可及誘直下吏其黨據舟山大猷環攻之
時小勝然苦仰攻將士先登多死新倭入沈家門俘賊
五十二戰小沽渡斬首二百四十廷臣詆宗憲并劾大

猷乃奪大猷及叅將戚繼光職賊自柯梅泛海流劫聞
廣宗憲利其去陰縱之不督諸將邀擊比爲御史李湖
所劾則委罪大猷縱賊以自解帝怒逮繫詔獄再奪世
蔭陸炳與大猷善密以已資投嚴世蕃解其獄大學士
徐階亦屢爲保持令立功塞上大同巡撫李文進習其
才與籌軍事乃造獨輪車拒敵馬嘗以車百輛步騎三
千大挫敵安銀堡文進上其制於朝遂置兵車營京營
有兵車自此始也先論平汪直功許除罪錄用及是鎮
筭有警川湖總督黃光昇薦大猷卽用爲鎮筭叅將破

雲溪賊巢三郡六縣妖逆次第削平饒平劇盜張璉數
攻陷城邑積年不能平詔移大猷南贛合閩廣兵討之
時宗憲兼制江西知璉遠出檄大猷急擊大猷謂宜以
潛師搗其巢攻其必救乃疾引萬五千人登柏嵩嶺俯
瞰賊巢璉果還救大猷連破之斬首千二百餘級用閒
誘璉出執之并執賊魁蕭雪峯廣人攘其功大猷不與
較散餘黨二萬不戮一人擢副總兵協守南贛汀漳惠
潮諸郡遂乘勝征程鄉盜走梁寧擒徐東洲斬黃積山
賊平請置平遠縣于五嶺閒尋擢福建總兵官巡撫游

震得請以大猷控制閩廣江湖數道命未下其冬倭陷
興化明年大猷與劉顯戚繼光滅之徙鎮南贛改廣東
潮州倭二萬與大盜吳平相犄角而諸峒賊藍松三伍
端葉丹樓等日掠惠潮閒閩則程紹祿亂延平梁道輝
擾汀州大猷以威名攝羣盜單騎入程紹祿營督使歸
峒他將與賊戰失利以俞家軍至恐之賊卽遁時峒寇
伍端被擒乞殺倭自効官軍繼之克其巢賊大潰乃移
師潮州以次降松三丹樓使招降吳平居之梅嶺吳平
旋復叛去遁保南灣大猷與繼光將水陸兵夾擊大破

之平僅以身免而部將楊克寬李超等躡賊後連戰不利平遂掠民舟出海大猷坐奪職總督吳桂芳畱大猷討河源翁源賊李亞元等徵兵十萬分五哨進大猷使閒攜賊黨而親搗其巢生擒亞元俘斬一萬四百奪還男婦八萬餘人乃還大猷職以爲廣西總兵官予平蠻將軍印擒伍端餘孽王世橋進署都督同知海賊曾一本犯廣州尋犯福建大猷合郭成李錫軍擒滅之錄功進右都督廣西古田獐黃朝猛韋銀豹等嘉靖末嘗再劫會城庫殺叅將黎民表大猷以都督同知佩征蠻將

軍印徵兵十四萬分七道進討連破數十巢賊保潮水
巢極巔攻十餘日未下大猷佯分兵擊馬浪賊而密令
叅將王世科乘兩夜登山設伏黎明諸軍攀援上賊盡
死馬浪諸巢相繼下斬獲八千四百有奇擒朝猛銀豹
百年積寇盡除進世廕爲指揮僉事大猷爲將廉馭下
有恩數建大功威名震南服而巡按李良臣劾其奸貪
兵部力持之詔還籍候調起南京右府僉書未任以都
督僉事爲福建總兵官海寇突入烽火寨坐失利奪職
復以署都督僉事起後府僉書領車營訓練三疏乞歸

卒賜祭葬贈左都督諡武襄大猷負奇節以古賢豪自期其用兵先計後戰不貪近功忠誠許國老而彌篤所在有大勳武平崖饒平皆爲祠祀譚綸嘗與書曰節制精明公不如綸信賞必罰公不如戚精悍馳騁公不如劉然此皆小知而公則堪大受戚謂戚繼光劉謂劉顯又薦于朝以爲吉甫方叔趙充國郭子儀之流亞也大猷與繼光均爲名將果毅不如而操行過之其論兵多參用儒家言李杜序其書謂其學莫非兵而論兵莫非易云著有劍經正氣堂集洗海近事兵法發微子容集

福建總兵官

明史舊志江南浙江通志西江志

閩書

合纂

趙恒字志貞號特峯晉江人瑞孫警穎負奇十三充弟子
員弱冠試高等受餼謂胡氏春秋闡素王心法功令標
以錄士而末學穿求崖穴繁掇枝條如捕風射影奮然
以推明經術爲已任務在揭康侯之精探宣聖之奧名
春秋錄疑嘉靖甲午薦鄉試第五等丁外艱讀書武夷
山中建州士多就問業戊戌成進士恒夙患耳疾然据
事誓吻響答弗爽乞就敎職得敎授袁州督學使者試
其文大駭服延於白鹿洞集諸郡儒父而師之遷國子